

中國地方志集成

遼寧府縣志輯 ⑮

咸豐岫巖志略

民國岫巖縣志

民國寬甸縣志略

宣統彰武縣志

鳳凰出版社 ● 上海書店 ● 巴蜀書社

岫巖志略序

周禮小史外史掌邦國四方之志是知志同乎史所以規政教之隆文物之盛而爲一邑文獻之徵也雖地有繁簡事有緩急要未可以其爲具文也而略之國朝二百年來荒邊夷徼盡列版圖瘴雨蠻煙咸通聲教而況東都爲發祥之區南國尤化行之地哉丁巳清和月大憲下符各州縣徵取事實續修通志斯舉也非徒炫耀乎簡冊殆實有勵精圖治勤恤民瘼之至意焉惟是岫邑建置未久經史俱無可考前此疆界大約附於鳳凰城者半附於遼海蓋復者亦半今既專城而治畫疆以理以方千里之地踞東南之雄且仰承朝廷謨烈之大山川鍾毓之奇與夫良司牧治行之善豈無土壤田賦如禹貢之所書者豈無民風物產如豳風之所圖者豈無孝子貞婦畸人異士如史乘列傳之所載者覽封疆之形勝宜思百世之宏謨探閭巷之歌謠亦瞻一時之文運若不及時考訂編次成帙以廣流傳竊恐

岫巖志略序

遼海叢書

數十年後老成之人已杳裨官之史難憑芳蹤遺跡恐湮沒於荒煙蔓草之餘當亦士君子之所深惜矣即守斯土者躬膺民社手握銅符而不知創於前者爲若何善於後者爲若何民何以庶富何以教徭役何以省訟獄何以平扼險提封谿山之固者何在窮簷曲巷士民之秀者何人將於上台殷勤望治之心督率作志之意不更大有所負乎治事之暇爰集都人士而告之故兼屬在籍李明府秉筆以將其事自夏月開局閱七月而稿粗就分門別類據事直書立言戒煩初無溢美雖無當於著作之林而要於採風問俗不無小補焉後有繼者學識宏通摭摭益富使豐編照物歷久彌光是尤余之所厚望也夫是爲序

咸豐丁巳嘉平月岫巖鳳凰城海防通判紅帶子湘涓台隆阿謹識於岫巖官舍

自序

丁巳初夏邑侯台公邀官署出示大憲檄文欲以修志一事相譚諉謂曰邑之無志也久矣斯誠盛舉然而千金裘非一狐易三都賦費十稔成是必集衆人之長而不責旦夕之效俾宏綱細目搜括無遺集語單詞裁酌悉當庶不致傳爲笑史邑之文士不乏人蓋一一招致之公曰諾延至季夏先後至者數人假館款之因前席諮請擬分門類各占甲乙以均乃事乃諸君以不敏辭之請之益力辭之益堅因循月餘迄無端緒未幾公復謂曰催符屢下矣案室道旁三年弗成諸君既以屬子子復奚辭聞之不勝瞿然竊惟志猶史也史兼三長而不有其一何以克副厥任況逢場作戲者研燧好醜莫不各有所有肖若以一傀儡登場作數優孟之衣冠不幾貽觀者以掩口胡盧乎凡人各有短長不能如霍王之無短何如效魏公之藏拙然不敢方公命也故積數月之思力勉成之嘗閱遺愁集有唐荆

岫巖志略序

遼海叢書

川云世間達官貴人皆有一部詩文集行世幸而詩文集皆不久磨滅若盡存世間即使一大地爲架子亦安頓不下儻悉付祖龍南山竹木煤炭盡當減價而之爲是志也亦以供南山竹木煤炭之用也可

芝巖李翰穎謹序

岫巖志略

修志姓名

監修

岫巖鳳凰城海防通判紅帶子

台隆阿

岫巖廳巡檢候補吏目

陳樹壩

纂修

議叙六品頂戴候選知縣

李翰穎

校錄

議叙從九品

王漢如

庠生

董士錫

岫巖志略 修志姓名

遼海叢書

岫巖志略

凡例

一盛京通志修於乾隆初年其時岫邑尙無有司官職故志岫獨略此外並無藍本凡由通志採入者旁註通志二字至通志斷語原加按字今於斷語之下更附斷語者則加謹案二字以別之

一凡郡邑各志俱首列星野一門蓋本馬班史例以天文測九州之地河山兩界精益求精不可謂子虛烏有也然以地按度彈丸僻邑不及百分之一而天體廣遠推測稍未精確便有毫釐千里之謬故不敢牽引附會姑闕以俟博雅者

一岫巖城守尉所屬弁兵賦稅職司非輕鳳凰城雖岫廳兼領亦有城守各官二者均未可略奈岫鳳城守兩署冊籍無考不能鑒空懸擬故凡通志所載者仍舊編入其爲採訪所及者科甲仕宦山川人物亦依次分輯弗存畛域之見餘惟闕以俟考

岫巖志略 凡例

遼海叢書

一志分十卷有志目有子目志目總小引其後分列子目俾閱者開卷瞭然

一戶口田賦以今較昔各有不同謹查現在冊檔開列其詳

一人物之得於採訪者詢謀僉同乃爲信史若出一人偏見及親故相爲標榜者不敢濫入至人生品行必俟蓋棺論定雖鄉評允協而其人生存者概不立傳

一節烈有關風化業經旌表者固宜按冊詳誌其或堅貞自矢年例已符而宗族單寒不能代爲表揚者顯微聞幽繫志是賴茲首列已旌之人餘悉附列於後至鄉僻愚氓不諳年例或有遲疑不敢呈請者謹錄部文一通繫於篇首庶閱者識旌典之維昭咸頌皇仁於無既焉

一岫邑自乾隆以前經界未正文無從稽考故藝文一志非惟無漢唐文字即國朝諸大家詩文亦復寥寥殊慚陋陋如有鴻生宿

儒惠以古人篇什亟當登之簡首比之吉光片羽焉

一岫巖鳳凰城有分志者有合志者如沿革營建輿地山川等類俱註鳳凰城附此以地分者也若人之在民籍者同一有司所屬無事區別至滿漢士子志同道合無所隔閡故選舉人物等類皆合志之

一志書例資考證岫邑幅輳寬廣而家鮮藏書載籍缺如僅就耳目所及者參訂成帙罅漏之譏知所不免百餘年來孝義節烈窮鄉僻壤之中採訪所不及者亦復何限日後續有見聞當別爲一編以備補遺

岫巖志略 凡例

二 遼海叢書

岫巖志略目錄

卷首

序

修志姓名

凡例

目錄

卷一

沿革 鳳凰城附

卷二

營建 城池 祀附 公署 倉庫 祠祀 鳳凰城城池公

卷三

輿地 輿城 附 村鎮 鳳凰城關隘 古蹟 島嶼 鳳凰城輿城村

卷四

岫巖志略 目錄

山川 鳳凰城附

卷五

食貨 戶口 田賦 物產

卷六

職官 通判 巡檢 鳳凰城巡檢 名宦

卷七

選舉 進士 武舉人 舉人 應例 封典 貢生 教習 武進士

卷八

人物 仕宦 文學 謄行 節烈

卷九

藝文 文 詩

卷十

雜志

岫巖志略卷一

沿革志 鳳凰城附

岫之邑非古也秦漢以上書史無聞魏晉而後率爲高句麗所據無從辨其經界延至遼金五京地拓始設縣治然一國而疆域分屬一朝而名號遞殊制度紛更未及垂之久遠至勝國而益淪於磨滅豈以海濱之地僻近朝鮮欲以不治治之乎國朝重念根本幅輳式闕規模一榛新莽之區頓闢爲苞桑之域儼然東南一重鎮矣溯厥由來宜何如持盈保泰握要以圖乎志沿革

漢武帝元封三年滅朝鮮置玄菟郡以高句麗爲縣使屬之賜以冠幘朝服鼓吹嘗從玄菟郡授之太平寰宇記

漢置遼西遼東樂浪玄菟四郡今府治爲挹婁國北爲扶餘國南近海爲沃沮國而遼東樂浪玄菟三郡則在今府治之東南及朝鮮界內地也通志

岫巖志略卷一

一 遼海叢書

謹按大清一統志寧海復州蓋平海城鳳凰城皆漢之玄菟郡地岫處五城之中其爲玄菟郡地無疑矣

金章宗時改辰州爲蓋州領建安湯池熊岳岫巖四縣仍隸東京通志

金明昌四年陞大寧鎮爲岫巖縣屬蓋州泰和四年廢貞祐四年復爲縣元復廢今蓋平縣城東二百四十里有舊岫巖城其東十里有新岫巖城想即此地其改築新城本末無考矣通志

唐貞觀十九年太宗親征遼遼四月李勣攻拔蓋牟城以其城置蓋州又攻拔遼東城以其城爲遼州六月攻拔白巖城以其城爲巖州通鑑

巖州本高麗白巖城唐太宗攻拔之以其地爲巖州遼改巖州白巖軍隸瀋州金初改屬東京之石城縣興定三年以石城縣之靈巖寺爲巖州元廢通志

據此巖州應在遼陽州境內

謹按大清一統志石城縣即今之鳳凰城則巖州應在鳳凰城境內岫與鳳凰相毗連今之岫巖或即昔之巖州乎未知孰是姑存以俟考

天聰七年遣貝勒濟爾哈朗築岫巖城東華錄

乾隆三十七年奉天府尹等奏稱奉天府屬岫巖鳳凰城地方從前分隸附近州縣管理並未設有專員請將熊岳理事通判移駐岫巖城奉旨依議乾隆三十八年請領新鑄管轄岫巖等處理事通判關防乾隆四十一年奏準將鳳凰城事務統歸岫巖理事通判兼管定爲衝繁要缺在外調補

道光六年吏部議覆奉天府屬岫巖鳳凰城環山濱海密邇外藩煙戶衆多訟牒紛繁應將岫巖理事通判準改爲岫巖鳳凰城海防通判揀選調補如不得人準其於滿漢知縣內揀選陞補道光十一年

岫巖志略卷一

二 遼海叢書

諸領改鑄奉天岫巖鳳凰城海防通判關防

鳳凰城沿革附通志

周朝鮮界本濊池秦同

漢屬玄菟郡東漢因之

晉隸平州

隋屬高麗慶州地

唐平高麗屬安東都護後渤海大氏據之爲東京龍原府

遼改開州鎮國軍統開遼一縣鹽穆賀三州屬東京金爲石城縣地

屬東京

元屬東寧路

明爲鳳凰城堡設兵鎮守本朝天聰八年設官兵通遠堡崇德三年移此鎮守

岫巖志略卷一

岫巖志略卷二

營建志 城池 公署 倉庫 祠祀 鳳凰城城池公署祠祀附

先王建邦設都所以域民也岫處萬山中城無三里未足增雉堞之觀邦有四民而獨缺學官之設其建置似無足記述然數百年來易鎮而爲縣復易縣而爲廳宏規鉅制無異州郡矣故城池皆衆志之所成公署皆政令所自出倉庫祠祀實養民事神所必需廢者修之墜者舉之何莫非營建之至計乎志營建

城池

蓋平縣城東二百五十里有舊岫巖城週圍二里三百零四步西南

二門按金志陞蓋州大寧鎮爲岫巖縣即此今城中設防守禦通志

蓋平縣城東二百四十里有新岫巖城週圍一百步一門惟餘土基

通志

謹按城之東西俱無新城基址詢諸父老亦無知者惟城南十五

岫巖志略卷二

一 卷二 蓋平縣志

里俗名娘娘城相傳爲高麗所建石壘僅存東南二門尙依稀可辨

舊城在今城之東偏東西南北四門東門近河在今城外大十字街東頭南門在今文昌閣北門在柴伙市西門今呼爲西門口此乾隆四十五年以前之舊城也通志修於乾隆元年故其時城中僅設有防守禦尙無廳署

再有舊土城在今城之北週圍八里四面四門其東西南三面已無跡可尋惟北一面在今公和店衙街之西一帶土基約略可識此猶在城東偏舊城之前其爲何代何人所修俱無可考乾隆四十五年

阿公精阿監修新城城基鋪石條三層外用鞞砌內用石砌週圍四百四十七丈三尺底寬三丈頂寬一丈二尺壕口六百八十五堵門

樓二座東曰旭升南曰阜昌

嘉慶十九年城垣內外坍塌數處經訥公奏捐修

道光七年城垣內外復有坍塌經吳公捐修

道光十九年東南門樓殘缺經錫公捐修

公署 倉庫 附

乾隆三十七年將熊岳通判移駐岫巖通判衙門在今城之東偏舊城內即今城外火神廟基址巡檢衙門在火神廟前至乾隆四十五年建修今城始將衙署倉廩監獄一併移新城內

通判衙門在中街西 頭門三間 儀門一間東西二角門 儀門

外東西班房四間 大堂三間 大堂前東西科房十四間 二堂

三間 二堂前東西廂房六間 二堂西茶房二間 東院花廳四

間 西院書房三間 花廳前院廚房三間 馬號三間 內衙正

房五間 東西廂房六間

道光二十三年章公朝教增修內宅東院正房五間 東廂房三間

道光二十六年玉公秀重修大堂

岫巖志略卷二

二 卷二 蓋平縣志

咸豐五年李公文森重修二堂前東西廂房東院花廳西院書房咸豐七年重修大門儀門照壁

監獄 大門內東封三間 西邊女封二間 獄房三間 中間爲

獄神祠 積儲庫在二堂之東間 積儲倉在內衙後 正房三間

爲倉書辦公之所 岫字廩三十間

巡檢衙門在通判衙門之西 頭門三間 儀門一間 大堂三間

大堂前東科房三間 西班房三間爲拘禁徒犯之所 二堂三間

東廂房三間 內衙八間 廚房三間

城守尉衙門在城內東街

城守尉府在衙門後

旗倉在舊城內正東康熙四十四年旗人捐建七間五十二年增七

間雍正元年又增七間

教場在城外

祠祀

衙神廟 在巡檢衙門西朔望行一跪三叩禮

關帝廟 城內居中凡有祈禱及朔望行香行三跪九叩禮內供龍牌每逢元旦暨吉凶大典俱在此分班行禮

龍王廟 在關帝廟旁朔望行二跪六叩禮

文昌閣 道光二十九年就舊城南門基址建修朔望行三跪九叩禮

禮

觀音閣 在文昌閣後身朔望行二跪六叩禮

關帝廟 在舊城南門路東

城隍廟 在舊城南門路西凡有祈禱及朔望行香行二跪六叩禮

火神廟 在舊城中街路東朔望行二跪六叩禮

關帝廟 在火神廟東爲山西會館

竈君廟 在關帝廟東朔望行一跪三叩禮

岫巖志略卷二

三 遼海叢書

財神廟 在東門外

瘟神廟 在東河沿

馬王廟 在廳署東偏朔望行一跪三叩禮

真武廟 在城西山

玉皇廟 在洋河北禧雨甚靈

鳳凰城城池附

城週圍三百八十步南一門其建始之年無考明時設官兵於此爲邊墩要地國朝設官兵鎮守附近城堡俱城守章京專轄不隸府縣

通志

謹按大清一統志明成化中築鳳凰城設兵戍守

鳳凰城公署附

城守尉公署在城內

旗倉在城內東北隅

教場在城外

巡檢公署在城南南門外 頭門一間 儀門一間 大堂三間

二堂三間 內衙三間 科房一間 班房一間 廚房二間

鳳凰城祠祀附

關帝廟 城東街

龍鳳寺 城內中街

上帝廟 城內

七聖祠 城東南

逍遙寺

觀音閣

朝陽寺 並在城東南十里鳳凰山上 通志

岫巖志略卷二

四 遼海叢書

岫巖志略卷二

岫巖志略卷三

輿地志 鳳城古蹟 村鎮 關隘 島嶼 鳳凰城疆域村鎮關隘附屬

岫處僻壤非東西南北之衝無車馬冠蓋之繁一寥落山城耳然地方千里東隣朝鮮南瀕大海兼有鳳凰城爲之附庸雖不必以谿山爲險固而海濱巨鎮恭布星羅郭外煙村襟山帶水沿海島嶼咸隸版圖雞犬相聞魚鹽爲利區分經畫固可按籍而知矣志輿地

疆域

東至哨子河六十里東鳳凰城界

西至棋盤嶺六十里西蓋平界

南至海一百五十里

北至分水嶺一百五十里北遼陽界

東南至洋河口一百五十里東鳳凰城界

西南至畢里河二百四十里西熊岳界南復州界

岫巖志略卷三

一 遼海疆書

東北至東分水嶺一百五十里東鳳凰城界西遼陽界

西北至姑嫂石一百三十里海城牛莊分界

北至盛京四百二十里 通志

村鎮

大孤山 城東南一百二十里舟車輻輳商賈雲集爲海口繁盛之區城守尉衙門每月派官一員汛兵五名山海關戶部設立稅局

雙山子 大孤山西南十五里設守汛旗兵五名

紅旗溝 城東南一百五十里設守汛旗兵五名

青堆子 城東南一百四十里城守尉衙門派汛官一員汛兵五名山

海關設立稅局

瀛納河 城南一百五十里設守汛旗兵五名

大莊河 城西南一百八十里舊名紅土埃子城守尉衙門派汛官

一員汛兵五名山海關設立稅局

搭拉腰子 莊河西二十里每歲立春以後便可通舟冬至以前船尚停泊爲境內多運海口

花園口 即沙河子城西南二百五十里設守汛旗兵五名

尖山子 城西南二百八十里設守汛旗兵五名

娘娘城 城南十五里牆皆石砌週圍里許東南二門石基猶存

城兒山城 城西南二百里城踞山上東南二門內有將臺南門外有某將軍碑字多殘缺

黃古島城 城西南二百五十里週圍一里二百五十步南一門 通志

謹按黃古島城在岫西南一百五十里通志誤屬鳳凰城界內今更正

關隘

關隘

大片嶺關 接明一統志在海州衛東一百一十里今在鳳凰城界

岫巖志略卷三

二 遼海疆書

內久廢 通志

謹按大片嶺在岫城北六十里今設有鋪遞鳳凰城界內距海城一百一十里並無此地名故爲更正

島嶼

鹿島 明總兵毛文龍曾駐兵於此天聰三年五月備禦石爾都他

哈布往鹿島征勦東 華錄

獐子島 天聰三年九月南界守備伊爾登勦獐子島獲明船四沈

三百人擒二十七人島內有明時馬將軍墩

石城島 明總兵毛文龍所屬諸島今列版圖納田賦矣

鳳凰城疆域附

東至靉江一百二十里朝鮮界

西至牛心山二百一十三里海城界

南至海一百六十里

北至分水嶺一百八十里遼陽界

東南至義州江一百二十里朝鮮界

西南至哨子河九十五里岫巖界

東北至孤山一百九十五里與京界

西北至分水嶺一百三十一里遼陽界

西北至盛京五百一十里 通志

鳳凰城村鎮附

青苔峪堡 城西一百七十里週圍三百三十六步南一門

蘭磐城 城西二百四十里週圍三百三十六步南一門

雪里站城 城西北四十里週圍二里一百二十四步南一門曰鎮

東明弘治四年建

通遠堡 城西北一百里週圍一里二百一十步南一門左一山城

相隔二里週圍一里九十步西一門右一新城相隔二里週圍一里

岫巖志略卷三

三 遼海叢書

六十步南一門

草河城 城西北一百二十里週圍一里一百六十步南一門

甜水站城 城西北一百八十里週圍三里九十步南北二門南曰

甜水站堡有塔

石城 城北六十九里週圍二里一百步南一門

鑾陽城 城北一百二十八里週圍三里一百二十步西南二門南

曰鑾陽城西一郭城週圍一里九十步南門上亦有鑾陽城三字明

時有守備鎮其地

孤山城 城北二百五十里週圍二里三十步南一門

灑馬吉城 城北二百四十五里週圍一里六十步南一門

一堵牆 城北二百七十里週圍三里六十步南二門

永奠 城東二百七十里

湯山城 城東南五十里

鎮江城 城東南一百里

宣城 城東南一百七十里

娘娘城 城東南一百四十里

寬奠堡 城東北二百九十里以上六城堡俱係邊外迤東入高麗

界 通志

龍王廟 城南一百六十里

北井子 城南一百九十里

黃花甸 城西一百五十里

鳳凰城關隘附

連三關 按明一統志在都司東南一百八十里朝鮮入貢之道今

在鳳凰城界內 通志

鳳凰城古蹟 通志

保州 高麗置領來遠一縣遼爲保州宣義軍領定遠懷化二軍來

岫巖志略卷三

四 遼海叢書

遠一縣金俱廢

來遠縣 本高麗故縣遼因之金有來遠舊址無考

宣州 遼置宣州定遠軍與懷化軍並隸保州金廢今有宣城在城

東南一百七十里

開州 本濊貊地高麗爲慶州渤海爲東京龍原府領慶鹽穆賀四

州龍原永安烏山壁古熊山白楊六縣遼建開州鎮國軍領穆賀鹽

三州開遠一縣金俱廢

按遼志稱山上營石爲城週圍二十里今鳳凰城山上古城猶在

唐薛仁貴征高麗與其大將溫沙門戰熊山擒善射者於石城即

此

宗州 遼聖宗置在遼東石熊山統熊山縣

熊山縣 本渤海縣地遼置隸宗州

開遠縣 即高麗龍原縣地渤海因之唐初廢遼聖宗復建金廢

鹽州 本渤海龍河郡領海陽接海格川龍河四縣遼廢縣以州隸開州金廢

穆州 渤海置會農郡領會農水岐順化美縣遼置穆州保和軍領會農縣金廢

會農縣 本渤海置遼因之隸穆州

賀州 本渤海吉理郡領洪賀送誠吉理石山四縣遼以賀州隸鎮國軍縣皆廢金併廢州

婆娑府 金史作婆娑路總管府天德二年置元初置婆娑路直隸省至元十七年以婆娑府屬廣寧後廢爲巡檢司

按明一統志在遼陽城東四百七十里今屬鳳凰城所轄地

臨溟縣 遼置屬海州金屬澄州元廢

按明一統志在海州衛東一百八十里今其地屬鳳凰城所轄界內

岫巖志略卷三

五二 遼海叢書

率賓府 渤海率賓地屬康州遼改率賓金廢舊址無考

按渤海傳渤海於古率賓國地置率賓府領華益建三州遼廢州存府金元州府俱廢今按建州在興京界內而率賓府及華益三州皆在鳳凰城界內

華州 唐渤海置遼併入率賓府舊址無考

益州 渤海置遼廢今城東南一百二十餘里朝鮮界有義州城朝鮮人呼愛州

平壤城 明一統志在鴨綠江東一名王險城今在界外

按遼東京所屬上有遼州鴨綠軍渤海號西京鴨綠府都督神桓豐正四州神鹿神化劍門三縣遼時故縣皆廢新置弘聞神鄉二縣隸遼州東那一縣隸正州又於遼州西北二百里置慕州今皆未知處所附記於此

岫巖志略卷三

岫巖志略卷四

山川志 鳳凰城附

岫邑白崕峻隘鳴綠環流襟山帶水不乏名勝每見直省郡縣各志凡名山大川皆繪爲圖今既無寫生妙手又不便僅志其名目俾名山勝蹟湮沒不彰故仿畫家白描法稍爲摩寫其形勢及有何祠宇碑碣一一記載以當繪圖庶遊斯土者知新安大好山水云志山川真武廟山 城西里許山不甚高自西北逶迤而南舒岡布麓煙樹迷離寺踞山均僅露一角邑中人每資臨眺焉

玉皇廟山 城北五里峰巒偃蹇林木蔥鬱殿閣巍然每值天旱禱雨輒應夏日游侶如雲左右兩山環抱右一山繞出其前岡壑起伏不見城市上有土臺正方高丈許疑爲高麗所置之烽臺云

娘娘宮山 城北三十五里山峰筆立上接霄漢山之陽有石廟制甚古旁有泉不溢不涸禱雨輒應山之陽壘石爲牆長數丈疑係昔

岫巖志略卷四

一 遼海叢書

人避兵處迤南二里許奇峰秀出尖圓而銳其上復有石形如卵而微扁上下承接處僅數寸而撼之可動不可移亦一奇也

龍潭溝 城西南六十里溝長約十里崇峰屹立如仙掌五指插天

絕壁之下泉流洶注又其下兩山合抱水被石攔無處宣洩乃石中裂尺許如巨蚌張口水噴激而下入一潭約二畝許圓而長水深莫測投以石寂無聲響其下復有一潭水較淺清可見底水由潭出則亂石礫秘喧聲雷鳴崩落而下漸流入河土人每遇天旱必至龍潭祈雨甚靈應

關門山 城東北八十里兩山巖嵒對峙東西相向高數丈形勢雄壯中夾一溪爲礮礮溝河流之門戶

唐帽山 城北一百二十里地名陽喇峪山勢北向巖谷幽邃山頂高凸如巾幘故名左右兩山蜿蜒而下怪石皆如人馬形其左一人一馬相間而行其右人各騎一馬聯轡而行望之皆逼肖左山環抱

其下有青雲寺前立穹碑苔蘚斑駁惟嘉靖年月尙可辨識寺皆石今雖坍塌石梁柱猶存寺前石盤無數其大倍常極人夫之力不能稍移咫尺故至今廢置山之北十里有北青雲寺寺宏敞可容數百僧衆山之背有小青雲寺今俱存惟此寺僅餘基址由寺斜折而上循石磴三十餘級懸崖峭壁中有一古洞內供佛像三尊鐘魚聞寂香火久廢曩聞有郭道士者在洞跌坐幾閱二十寒暑忽失所在此後卓錫無人矣西南諸山連互甚長踰七八里忽一山昂起巔頂下覆如蓋絕壁之下稍平坦緣壁一土坑約長三丈內皆磚砌至今未損前有古井黝暗莫測內有鐵鎖下垂上綴井旁石柱數人拽之不能理其端撒手則仍墜詢之土人皆莫得其故云

白雲洞 城北九十里地名松坨子與唐帽山皆係一脈山南向高峻陡險無徑可通鑿石爲磴道每磴之旁皆有石柱人可攀援而上數之得九十六級其極高處一級獨缺補以巨石撼之猶動極力推

之不能稍移分寸尤不可解者如此險徑隻身上行尙恐眩暈欲墜不知當日何以挾此巨石而上也有洞大如三間屋供佛三尊洞前簷水常滴雖旱不涸洞之左皆巉巖石壁萬丈懸崖也乃有天然石梁如長虹陵空而上石磴三十六級級有跌坐處三愈高愈險僅可容膝必挽手石柱而坐稍有差跌不可問矣中有寺曰白雲寺至今香火甚盛

仙人洞 城西南九十里地名二道溝入溝二里許有關帝廟甚偉麗兩山蜿蜒如游龍中一峯突兀特起如寶塔矗立其上重重旋繞又似巨螺盤絲尖圓而銳上刺雲霄登此山者自山下斜行踰一高岡稍上則峭壁嶙峋疑無路矣乃石壁中裂一綫石色皆紅如石榴綻裂中鑿石磴緣磴而上如蟻蝨之循衣縫至縫盡處復折而西有臺稍平坦果木成林旁有二井水清見底循井旁北行抵一洞磚砌旋門上嵌石額鐫古洞天三字洞內龍王廟梁柱皆石前有明時嘉

靖年間碑其後有高樓曰玉皇閣登其上甚豁朗蓋洞之上復有洞中間相通此閣正對上面之洞口也洞口之前有平臺就臺鋪石漸次展開上建望海樓高與雲齊南望大海如河流之一泓瘴塵石城諸島撲地如培塿往來帆檣如蠅矢集鏡大孤山大莊河諸處村鎮如碧煙數點歷歷在目樓後精舍三楹後壁有門開門復得一洞攢行數十步緣軟梯而上漸露天光抵洞口有石僅容膝爲道人跌坐處背後尙有憑藉俯瞰其前則岌岌欲墜矣洞旁穿復有洞幽深莫測故人無能窮其境相傳有宏真道人者清修數十年預卜死期鼻垂玉柱結跏坐化卒之日曾於海州道上遇一舊相識託寄雙屨與其徒驗之良不爽故或疑其羽化云

冰峪 城西南九十里英那河之上流由西北山口流入復折而南兩山壁溪而立如列屏障重岡疊嶺峯秀絕北山有石方而長平正光滑嵌入巖際名曰碑兒石下臨深澗山半嵌空石洞錯落如繁

星皆峭壁險絕無人徑稍南有高麗城亂石堆砌直接山巔其下兩山合抱如門戶重重殊壯觀瞻第山與水合不納輪蹄通漁樵之徑而已關帝廟龍王廟諸寺皆倚山枕溪山裏無寸壤故人跡罕到千佛洞 城西南百里毛兒嶺之東崛起一山峭壁哈呀山半古洞無數嵌空如蜂房聯綴如星宿有闕而圓者有側而曲者有黝暗莫測者有玲瓏相通者其中皆有一佛故名

小孤山仙人洞 城西北九十里小孤山之對面曰仙人洞洞有二稍南者洞口較闊敞橫互石腦洞外有藥王廟洞內黑暗無光土人有欲窮其境者數人結隊籠燭而入初進頗寬闊掉臂綽有餘地但見石乳所結萬象羅目再進則稍隘越此又復寬闊約行數里抵一河水流洶湧人莫敢渡惟見對岸石門有光射入洞內時有惡風鼓盪如挾雷霆故人相戒不敢復入每聞風聲必有蝙蝠往來洞口其大倍常廟祝時一見之其北復有一洞差小內供佛像前有池

足供廟祝之飲洞上橫嵌一石題曰玉洞

駱駝磯子 城南六十里西南諸山皆其一脈乃諸山之極高者山巔平坦廣約數畝多產山韭上有池雖旱不涸龍潭溝冰峪諸水皆發源於此

雞冠山 城西南一百七十里山峰鵠立巋然特出巔頂玉削形似雞冠故名

西一面山 城西南一百八十里峰巒森立嵯峨霄漢重岡疊阜綿亙數十里迴環向背具饒佳致仙宮梵宇星布棋列西南諸山此獨當一面焉

城兒山 城西南二百里東西兩山壁立如牆高峻陡險中夾一溪自北而南入碧河東山之背稍平坦有盤道可通上有古城橫跨山脊東南兩門旁有高臺城內石壘無數東門外一碑半沒草萊中字跡湮漫僅餘將軍二字相傳爲蓋蘇文之遺云

幽巖志略卷四

四 遼海叢書

桂雲山 城西南二百二十里巖石屏列溪水環流山頂有潭廣數畝澄清如鏡每值天旱土人輒於此禱雨頗著靈應

大孤山 城東南一百二十里山插地怒起石骨嶙峋林林疎秀山

左抱有天后宮關帝廟文昌閣諸寺樓閣崢嶸金碧錯落殆類畫圖

循寺旁斜徑而上約里許石壁陵空峰巔下覆如蓋中有洞頗虛敞

前有平臺有寺曰聖水宮旁有樓曰一層樓景甚幽渺南望水天一

色往來帆檣如波面鳧鷖東南鹿島獐子島皆在足下故遊者咸快

登覽焉洞上一滴淙淙下注下有聖水池石天然內陷不由人工

有黑魚數尾長五六寸游泳其中水不涸魚亦不去絕壁之上有洞

與山背相通山之後有背陰寺重樓疊閣皆在雲煙縹緲中山之左

有高麗城將臺猶存山下有古樹形甚異對山有戲樓闌闌鱗比其

下則煙樹迷離帆檣如林魚蝦成市舟子款乃殆不異江南水鄉云

將軍石 大孤山西南三十里潮溝沿之西海灘一望無際中有石

突起高數丈望之昂然人立儀狀雄偉西數里復有一石差小於前亦具人形故土人呼爲大將軍二將軍云

木耳山 城南一百八十里毗近海濱峰巒迴合蒼翠杳靄逶迤數十里其中村落十數皆依山枕水迤東一峰崛起上有烽臺基址完固相傳爲前明備倭處也

岫川 木耳山之東南二里許三峰壁立一水環流中構瓦屋數楹爲許氏別墅層巖入畫流水鳴琴松枝交蔭蒼翠滴衣雖不能比昔人之輞川而風景天成較之鑿石引泉者迥不侔矣

三坨子 木耳山之南海內三峰矗立御風排雲煙景如畫漁人操舟捕魚類集於此北岸石磴峻嶒兩峰對峙一徑中通名曰石門

羊喇峪 城北一百四十里
麟溝山 即高麗館山城北一百一十里
花紅峪 城北一百四十里

幽巖志略卷四

五 遼海叢書

北分水嶺 城北一百五十里明一統志分水嶺在蓋州衛東一百四十里綿亙數百里山下有泉東西分流故名

恒恒峪 城北一百二十里

黑峪 城北一百四十里

姑嫂石 城北一百三十里

弟兄山 城北一百四十里

牛心山 城北一百四十里

分水嶺 城北一百里有水西流爲楊柳河五重河發源於此

小片嶺 城北八十里

大片嶺 城北六十里

磨孤峪 城東北一百三十里

香爐山 城東北一百十里

噴喇山 城東北八十里俗呼礮洞溝

老觀嶺 城北十里

大嶺 城北五十里今名太平嶺

大孤嶺 城南十里

二道狐嶺 城南二十里

三道狐嶺 城南三十里

四道狐嶺 城南五十里自小片嶺至此前屬牛莊章京管轄自羊

喇峪至此通志屬海城境內今更正

蘭菇嶺 城西南九十里

劉草峪 城西南八十里

瓦子堂 城西南六十里

龍爬峪 城西北三十里今名龍寶峪

貓兒嶺 城西南一百里石佛溝河畢栗河俱發源於此

仙人嘴 城南二十里

鮑巖志略卷四

六 遼海叢書

石佛溝 城西南五十里

哈什驢嶺 城西南一百里

徐家大嶺 城西南一百六十里自蘭姑嶺至此通志屬蓋平縣境

內今更正

五塊石 城南一百六十里

鐵山 城南一百七十里

管家山 又名歪頭礮子城南一百里

哈什驢山 城西南二百里自五塊石至此通志屬鳳凰城境內今

更正

石嘴河 城南一百二十里源出高嶺南流至五塊石入海

瀛納河 城南一百五十里源出冰峪東南流至黑島東入海

五道河 城北五十里即洋河之上流自偏嶺東南流行入連過

五次故名源出分水嶺東南流至大孤山入海以上三河通志屬海

城境內今更正

洋河 城北五里城東南一百四十里

鴨兒河 城南十里

牯牛河 城北一百四十里

哨子河 城北一百二十里城東五十里城東南六十二里源出牛

心山

溫泉 城北二十里地名湯池溝南有山不甚高溪壑宛轉中藏山

寺高下掩映山下不數武有溫泉水勢騰沸聲湯然氣滃滃然若

雲蒸霧霈需泉水泡起大小錯落如散珠投以錢翻翻作蛺蝶舞良久

乃下其初漫羨流溢土人鑿石爲池鑿石以通水道上覆瓦屋三楹

每當春夏之交男女趾錯於道趨赴者雲集相傳浴此能除疾往往

有效城東九十里暨鳳凰城北三十里俱有溫泉與此略同又城北

五十里有狗兒湯通志誤載鳳凰城境內城東北百二十里有大湯

鮑巖志略卷四

七 遼海叢書

溝小湯溝皆溫泉也今祇存其跡耳

鳳凰城境內山川附

鳳凰山 城東南五里按明一統志在都司城東三百六十里上有

壘石古城可容十萬衆唐太宗征高麗駐蹕於此即指此山也通志

鳳凰山自遼城東行三日出連山陰乃至其地蓋去朝鮮境尙百有

餘里土人稱爲開州其地蒼莽無人之場山勢周環連互不絕惟南

面少缺如人臂合抱而掌未及接者首尾低昂大麓偃伏左右若兩

翅東西相望宛如一大山不知其中能寬闊空隙也王慎中鳳凰山

記

山在鳳凰城東南十里重巒疊嶺源深根盤峰回路轉引入佳境山

半諸峰如建屏其上則鬱怒磅礴削壁插天攢峰竦劍望之嶙嶙焉

岫岫焉如立如行若翔若舞或欹側而相倚或俯仰而相抗千態萬

狀愈幻愈奇山多泉壑爲溪流澎湃而下勢如箭激至山坳低處細

流淙淙又復清澈如鳴琴潌人塵耳山之半有靈官廟陟重岡而上得平地中陷如釜三官廟九聖寺及諸道院均在釜底中西上一山有斗母宮藥王廟又西有朝陽寺寺皆石前有石塔其後有娘娘廟皆在懸崖陡壁間石徑嶮巖東上一山有洞曰朝陽洞入洞數武有池方不踰丈而水甚深錦鱗游泳見人了無驚意去池又數武洞穴斜轉向上隘僅容身犬伏而升歷數十級漸露天光洞旁有觀音閣乃極高處下視行人如豆遍山皆玉蘭花開時馨香襲人林樹陰翳山鳥多不知名春秋佳日遊人如織乃奉省四大名山之一也山脈甚長其東南殆不可究竟云

藥山 岫城東北一百二十里地名大寺溝亦四大名山之一循溝而東兩山相抱如門戶重重至山脚奇境忽開四山合沓奇峰挿天石筍林立或如猛獸蹲伏或如甲杖森列筆卓劍植蒼蒼玉削其間溪壑宛轉林樹清幽樓閣參差煙雲繚繞每當春花秋月恍疑蓬萊

方丈不是過也山之左有三清殿關帝祠金碧錯落前有嘉靖萬歷年間碑字多磨滅寺旁溪流汨汨循溪流而上山徑拗折抵山半約三里許峭壁之中石突出如擎荷蓋上稍平古木參天大皆合抱百餘年物也上建碧霞宮三楹規制巍然山門而外則萬丈懸崖矣由寺後循徑東上石磴險絕約二里許有洞曰青華觀洞前石覆如屋簷水一滴繁累如貫珠承以石盆足供數人之飲以之烹茶甘冽異常其洞爲道人跌坐之所洞之上有玉皇閣最高俯視東南諸山皆如蟻蛭又其北有斷壑俯瞰無底其上橫跨老樹爲梁歷年已久至今猶賴此以通往來

清涼山 岫城東北一百二十里山向東南左右兩山環拱皆摩霄挿雲中一峰蜿蜒而下至救苦觀則峰巒昂起截然而止觀之後山脊竦立一高臺臺正上方上建觀音閣崢嶸天際前有明時萬歷年間碑俯瞰其下不知幾百由旬登此閣者歷石磴數十級抵山之半其

上峭壁截巖無處納足緣木梯而上奮勇攀登無不股栗想見當日建修此閣之難閣之西北山稍坦夷玉皇廟關帝廟娘娘廟佛爺殿皆在蒼茫雲樹間清磬一聲則萬山齊應誠仙境也東北有羅漢洞乃極高處洞旁有石匣撼之可動不可開人跡亦罕到云

帽盔山 岫城東北一百四十里小西溝廟之南萬峰重疊中一峰轟逼霄漢峭石卓立形如兜鍪故名山頂有泉甚清冽乃東北諸山之最高者

鳳翅山 岫城東七十里山南向奇峰森列若翔若舞高出雲表連巒別巘盤踞十餘里山下有三官廟真武廟諸寺稍北有三清觀重樓高聳丹碧煥映中有明時天啓年碑碣循樓北而上石磴三十三級有娘娘廟又其上石磴四十八級陟山之巔有玉皇廟俯瞰諸峰皆在履底西北一山上有古城東南二門北二里許有山名十八丈崖崖壁巖峩若崩若墜不敢仰視上有圓石如人立圓石之上復有

石塔高二丈許不測何人所建山下有潭水紺碧深不見底佛小島 岫城東南一百六十里北井子南五里海灘中一山拔地怒起巖石峭削一徑僅通山頂有望海寺佛殿龍母宮諸寺豐碑屹立明時萬歷年建山之陰石徑峻峭中隔斷壑下臨無底深澗一木橫亘其上木似朽而不敗有泉曰甜水井井旁一樹甚異枝葉隔年一榮枯老於山林者皆不識其名山樹甚繁人獨不敢折一枝一葉相傳折之必遭癘疾須虔禱乃已

東一面山 岫城東南八十里西面羣峰拱崇巖巖起伏東面一山巋然屹立峰巒偃蹇延袤數十里山之前有石城其下有雙泉寺明宏治五年建左右雙泉夾瀉故名西南巖際有達洞乾隆年間有僧通和跌坐其中畜一鹿甚馴每出輒施以羈勒乘之以行後僧圓寂鹿不知所之山之左曰鐘阜山盤踞十餘里禪連烏岫山巔有泉可驗陰晴晴有霧則雨陰無霧則晴屢驗不爽旁有朝陽觀斷碑猶存

稍南有朝江寺明成化二年建又南有望海寺明成化五年建山之北有地名陡溝子上有松樹岡松樹三株虬枝古幹皮如龜甲數百年物也人有斧其一枝者輒昏眊致疾必祭禱乃解土人嘗勒石以誌異

沙里砦山 岫城東一百二十里峰羅巘峙枕山跨壑有禪庵焉曰龍泉寺旁有井曰龍泉相傳泉底通河寺僧汲水綆斷墜汲器於內後得之於洋河始信元季舊有石廟前臨大河明初商舶輻輳有翟洪者增修大殿三楹落成日寺旁有泉湧出遂名龍泉寺至萬歷二十一年遼西廣寧總兵李成梁遼東副總兵祖承烈參將徐同仁鳳凰城指揮徐惟勳掌印僧官洪恂副僧官性容里人李景春翟永元捐資重修并置田以供香火碑誌甚悉

雙山 岫城東南一百八十里洋河東南兩峰對峙其上壘石爲城泉流淙淙懸崖之下有佛寺古碑半臥土中前有石塔不知何年所

岫巖志略卷四

十一 遼海叢書

建其下古墓壘土人相傳爲高麗墳云

老虎洞 岫城東一百八十里海之北岸洞口高丈餘內闊五六丈怪石嵒竒下覆若駭豹蹲獅翹翹欲墜相傳昔年有虎踞此洞獵食近村者然當海潮洋溢水浸洞口或云今之虎穴乃昔之蛟窟也理合然與

狼頭山 城東南一里

對頭山 城南四十里

鷗鵲山 城東八十里

長山 城南一百里

妙山 城南一百十里

雙山 城南一百三十里

栽林山 城南一百三十五里龍頭河發源於此

塔子山 城南一百六十里

樓子山 城南一百七十五里

窟窿山 城南一百九十里

年馬善山 城西南四里

多和山 城西南五里

雙嶺 城西南三十里

喀巴嶺 城西南三十里

鷗立嶺 城西南一百五十里

砥塔山 城西南一百十里

松子山 城西南一百十里

迷入山 城西南一百十里

土城山 城西南一百五十里

小黑山 城西南一百五十里

大黑山 城西南一百六十五里

岫巖志略卷四

十一 遼海叢書

龍抓山 城西南二百十里

五塊石 城西南二百二十五里

鐵山 城西南二百三十五里

小松島 城西南二百里

管家山 又名歪頭砬子城西南三百五十里

小橫山 城西八里

大橫山 城西五十里

挫草山 城西六十里

尖山砦 城西一百四十里

青苔峪 城西一百七十里

碭石山 城西一百七十里

土龍山 城西北四里

卯孤獨山 城西北二十五里

長嶺	城西北四十五里
陡嶺	城西北四十六里
土門山	城西北七十里
龍鳳臺山	城西北八十五里明一統志作龍鳳山
分水嶺	城西北一百三十五里響水河通遠堡河發源於此西北併入太子河又復東南匯鴨綠江入海
剛家山	城西北一百三十里
連山	城西北一百四十里
桃樹峪	即草河哈達草河發源於此城西北一百五十里
摩天嶺	俗呼高嶺城西北一百七十里
分水岡	城西北一百七十五里
筆架山	城西北一百八十里
小黑山	城西北一百九十里細河發源於此
青石嶺	城西北一百九十五里
虎狼溝嶺	城西北二百十里
梨花峪	城西北二百二十里
三家嶺	城西北二百六十里
大黑山	城西北二百七十里拉門河發源於此
大峪山	城西北二百八十里
牛頭崖	城西北二百八十里出香煤產青石可爲碑
青雲山	即平頂山城西北二百九十里此山之脈接連山峪形多方
按明一統志在遼東都司城東北一百里山週圍三十里其頂平斂可耕稼有泉湧出以石八角鑿之中有魚即此山也	
平嶺	城西北三十八里
哈什臺嶺	城西北三百七十里

西馬吉山	即三鳴山城北三十五里
賽莽阿山	即賽莽河哈達城北四十五里
覺坡	即覺海福祿城北五十里
刷顏坡	城北五十七里
雙嶺	城北七十九里
陡嶺	城北八十九里
白楊木嶺	城北一百六十里
奈磨嶺	城北一百六十九里三岔子河發源於此
大王嶺	城北一百七十里
黃波羅峪	又名水嶺城北一百八十七里
孤山	城北二百五十里
金口峪	城北二百五十里
龍頭河	城南一百四十里源出義林山流至窟窿山西入海
岫巖志略卷四	
十三 遼海叢書	
六道河	城西南四里源出帽盔山流入草河
相子河	城西二百七十里源出海城縣東分水嶺會五重河流入洋河
通遠堡河	城西北三十里源出分水嶺會於草河
響水河	城西北一百三十里源出分水嶺流入細河
細河	城西北一百四十里源出境內小黑山入太子河
拉門河	城西北一百八十里源出境內大黑山入太子河
響河	城北二十里源出邊外自高麗響陽城西北五里入邊至城東南二十里出邊流入鴨綠江
西馬吉河	城北三十里源出黃波羅峪流入響河
草河	城北三十里源出桃樹峪入響河
三岔子河	城北一百十里源出奈磨嶺入響河